

visionibus, omninò videtur consultum: reliqua quæ hæc declarari poterant plenius, in tempus commodius reservabimus.

## CAPUT SEPTIMUM.

## Argumentum.

Summa.

Institutiones hujus populi.

Occasio.

Quæstio.

**H**ætenus in secunda hujus prophetiæ parte, quæ ad templi instaurationem, urbis reedificationem, & populi reducis, in utraque laborantis per visiones divinitus oblatas excitationem ac confirmationem necessariam pertinebant, vidimus: Sequitur nunc ut Institutiones ejusdem populi jam melius deinceps habentis & sperantis accedamus. Quia enim nunc satis constabat de paternâ Dei erga hunc populum suum providentia, cum ex visionibus novem hætenus declaratis, tum ex ipsa experientia, quatenus templum ac Urbs, quorum ædificatio antea sæpius fuit interrupta, & sæpè diu per hostes impedita, maximâ ex parte erant restaurata, quando utriusq; reparatio benè sub manus succedebat, & de futuro complemento c. 4. v. 7. promisso bona spes Judæos fovebat, meritò Deus vicissim pro isto suo multiplici beneficio populum per prophetam erudit de sibi præstando officio, idque occasione hæc satis commodâ. Quum videbant Judæi re ipsa edocti omnia jam per Dei gratiam apud se esse lætiora, quàm vel olim in exilio, vel paulò ante, illo soluto etiam, consulunt peculiari quadam legatione sacerdotes & prophetas, num sit deinceps eodem modo & tempore jejunium publicum instituendum, ut tempore captivitatis & infelicitatis prioris factum fuerat, hæc est quæstio. ita autem à Deo per prophetam